

石林居士建康集

宋葉夢得著

石林居士建康集

宋王象之撰

周木屋建康集

後村

補遺文二首

周木屋建康紀末略一卷

民國九年歲
次庚申三月
石竹山房書
局校正重印

重刻建康集序

宋葉石林建康集八卷舊刻已亡藏書家僅有傳鈔之本
中亦間有殘闕茲其裔孫廷琯重加校勘并附入所輯紀
年略一卷逸文若干首而付諸梓屬余爲之序按公詩文
筆力之雄厚書春秋學之深邃爲前人所推許其他論著
亦多有可采而余覽是集尤深歎公之才略爲不可及也
蓋公當高宗南渡兩帥建康經戎馬蹂躪之餘死傷載道
府寺民廬鞠爲榛莽公內盡休養之道外竭備禦之方兼
綜財賦給諸軍饋饟不乏俾得悉力於戰而又於其間繕
葺講堂刊購經史以作興文教其事功卓卓如此而世之
論者以公會依附蔡京爲病夫自古小人在位往往援引

英流推轂時彥藉收物望而便已私才人稍不自謹卽爲所牽致如柳子厚之於伾叔文是已据公本傳在徽宗朝用京薦召對而建言有體大觀初京再相凡法度之已罷者復行公上言其不可又規京以童貫宣撫陝西亦頗持正至附京之實乃互見於他人傳中是公蚤歲立身誠爲可議而其後請卹太學生陳東歐陽澈卒以辭帥蜀忤秦檜意致仕未嘗無晚蓋之心況才略之過人平生所歷州鎮皆有能聲故雖嘗罷斥胡文定公以其蔡頴南京之政薦之於朝謂不當以宿累廢其見取於當世名賢夫豈偶然哉公總集百卷惜已佚此爲再帥建康時所著獨幸而存誠當謀所以傳遠廷琯表章先人之意與其校勘是集

之勤亦有足多者余故不辭而序其首道光二十三年歲次癸卯夏四月震澤張履書於句容學舍

宋史本傳

葉夢得字少蘊蘇州吳縣人嗜學早成多識前言往行談論亹亹不窮紹聖四年登進士第調丹陽尉徽宗朝自婺州教授召爲議禮武選編修官用蔡京薦召對言自古帝王爲治廣狹大小規模各不同然必自先治其心者始今國勢有安危法度有利害人材有邪正民情有休戚四者治之大也若不先治其心或誘之以貨利或陷之以聲色則所謂安危利害邪正休戚者未嘗不顛倒易位而況求其功乎上異其言特遷祠部郎官大觀初京再相向所立法度已罷者復行夢得言周官太宰以八柄詔王馭羣臣所謂廢置賞罰者王之事也太宰得以詔王而不得自專

夫事不過可不可二者而已以爲可而出於陛下則前日不應廢以爲不可而不出於陛下則今不可復今徒以大
臣進退爲可否無乃陛下有未了然於中者乎上喜曰邇
來士多朋比媒進卿言獨無觀望遂除起居郎時用事者
喜小有才夢得言自古用人必先辨賢能賢者有德之稱
能者有才之稱故先王常使德勝才不使才勝德崇甯以
來在內惟取議論與朝廷同者爲純正在外惟取推行法
令速成者爲幹敏未聞器業任重識度經遠者特有表異
恐用才太勝願繼今用人以有德爲先二年累遷翰林學
士極論士大夫朋黨之弊專於重內輕外且乞身先衆人
補郡蔡京初欲以童貫宣撫陝西取青唐夢得見京問曰

祖宗時宣撫使皆是見任執政文彥博韓絳因此卽軍中拜相未有以中人爲之元豐末神宗欲命李憲雖王珪亦能力爭此相公所見也昨八寶恩遽除貫節度使天下皆知非祖宗法此已不可救今又付以執政之任使得青唐何以處之京有慙色然卒用貫取青唐三年以龍圖閣直學士知汝州尋落職提舉洞霄宮政和五年起知蔡州復龍圖閣直學士移帥潁昌府發常平粟振民常平使者劉寄惡之宦官楊戩用事寄括部內得常平錢五十萬緡請糴粳米輸後苑以媚戩戩委其屬持御筆來責以米樣如蘇州夢得上疏極論潁昌地力與東南異願隨品色不報時旁郡糾民輸緡就糴京師怨聲載道獨潁昌賴夢得

免李彥括公田以黠吏告訐籍郟城舞陽隱田數千頃民詣府訴者八百戶夢得上其事捕吏按治之郡人大悅戢彥交怒尋提舉南京鴻慶宮自是或廢或起逮高宗駐蹕揚州遷翰林學士兼侍讀除戶部尙書陳待敵之計有三曰形曰勢曰氣而已形以地理山川爲本勢以城池芻粟器械爲重氣以將帥士卒爲急形固則可恃以守勢強則可資以立氣振則可作以用如是則敵皆在吾度內矣因請上南巡阻江爲險以備不虞又請命重臣爲宣總使一居泗上總兩淮及東方之師以待敵一居金陵總江浙之路以備退保疏入不報旣而帝駐蹕杭州遷尙書左丞奏監司州縣擅立軍期司掊斂民財者宜罷上諭以兵食二

事最大當擇大臣分掌門下侍郎顏岐知杭州康允之皆
嫉夢得又與宰相朱勝非議論不協會州民有上書訟夢
得過失者上以夢得深曉財賦乃除資政殿學士提舉中
太一宮專一提領戶部財用充車駕巡幸頓遞使辭不拜
歸湖州紹興初起爲江東安撫大使兼知建康府兼壽春
等六州宣撫使時建康荒殘兵不滿三千夢得奏移統制
官韓世清軍屯建康崔增屯采石閭皐分守要害會王才
降劉豫引兵入寇夢得遣使臣張偉諭才降之以其衆分
隸諸軍濠壽叛將寇宏陳卞雖陽受朝命陰與劉豫通夢
得諭以禍福皆聽命及豫入寇卞擊敗之齊兵宵遁八年
除江東安撫制置大使兼知建康府行宮畱守又奏防江

措畫八一申飭邊備二分布地勢三把截要害四約束舟船五團結鄉社六明審斥埃七措置積聚八責官吏死守又言建康太平池州緊要隘口江北可濟渡去處共一十九處願聚集民兵把截要害命諸將審度敵形併力進討金都元帥宗弼犯含山縣進逼歷陽張俊諸軍遷延未發夢得見俊請速出軍曰敵已過含山縣萬一金人得和州長江不可保矣俊趣諸軍進發聲勢大振金兵退屯昭關明年金復入寇遂至拓臯夢得團結沿江民兵數萬分據江津遣子模將千人守馬家渡金兵不得渡而去初建康屯兵歲費錢八百萬緡米八十萬斛權貨務所入不足以支至是禁旅與諸道兵咸集夢得兼總四路漕計以給饋

餉軍用不乏故諸軍得悉力以戰詔加觀文殿學士移知福州兼福建安撫使海寇朱明猖獗詔夢得挾御前將士便道之鎮或招或捕或誘之相戕遂平寇五十餘羣然頗與監司異議上章請老特遷一官提舉臨安府洞霄宮尋拜崇信軍節度使致仕十八年卒湖州贈檢校少保

建康集昔賢題敘

書錄解題一則

陳振孫著

石林建康集十卷皆帥建康時詩文其初以所莅官各爲一集後其家編次總而合之此集其一也

帶經堂集一則

王士禎著

葉石林晁氏之甥學有師承筆力雄邁猶有東京盛時風氣非南渡諸人所及按經籍志石林集百卷今所傳止建康集八卷餘率湮沒幸避暑錄話燕語放言玉礪等書猶存說部中豈一人之身其著書傳不傳亦各有數耶石林之學尤邃於春秋觀集中荅王從一教授二書可見

居易錄一則

王士禎著